



KESYON MOUN POZE SOUVAN SOU APRANTISAJ A DISTANS



- **Ki lè Liy Enfòmasyon Aprantisaj a Distans la ouvè?** Liy la aktif soti lendi rive vandredi kòmanse 8:00 dimaten pou 4:00 nan aprèmidi.
- **Èske m toujou ka prete oubyen ranplase yon aparèy mobil?** Aparèy mobil yo ap disponib pou prete oubyen chanje nan sant distribisyon nou deziyen yo. Silvouplè vizite <http://covid19.dadeschools.net/> pou plis enfòmasyon sou andwa distribisyon yo.
- **E si m pa gen entènèt lakay mwen?** Distri a ap travay avèk diferan founisè entènèt pou ouvè rezo yo e ofri entènèt gratis. 'Hotspots WiFi Xfinity' atravè peyi a disponib pou nenpòt moun ki bezwen yo gratis - ki gen ladan menm kliyan ki pa gen abònman entènèt ak Xfinity. W ap jwenn yon kat jewografik ki disponib avèk 'hotspots' ki disponib yo [la a](#). Yon fwa ou nan yon 'hotspots', konsomatè a dwe chwazi non rezo "xfinitywifi" nan lis non 'hotspots' ki disponib yo, epi, lanse yon navigatè. Comcast te kreye tou nouvo koleksyon edikasyonèl pou tout nivo ane eskolè an kolaborasyon avèk 'Common Sense Media'. Kliyan yo ka di mo "edikasyon" nan vwa telekòmand X1 oubyen Flex yo ap sèvi a. AT&T ofri aksè entènèt pou fanmi ki kalifye ki pa gen gwo revni yo a \$10 pa mwa atravè pwogram Aksè AT&T yo a. Yo ofri tou de (2) mwa sèvis gratis nouvo Aksè bay kliyan AT&T. Aprann plis [la a](#). Anplis, Distri a distribiye plis pase 11,000 hotspots/telefon entelijan pou elèv lekòl segondè. Elèv lekòl segondè yo ka mande yon telefon Samsung yo kapab itilize kòm yon hotspots nan lekòl yo. Distri a fèk resevwa yon lòt 1000 telefon pou elèv yo.
- **Konbyen èdtan nou espere pou elèv yo travay chak jou?** Nou pa atann pou elèv yo travay sou devwa yo pou tout yon jounen lekòl. Tou depan de nivo ane eskolè yo ak lòt faktè, kantite tan elèv yo pase ap fè travay lekòl yo ap varye. Lè nou konsidere reyalyte kondisyon sa yo, travay klas elèv yo ak devwa yo se esansyèlman menm bagay la, e lè nou konsidere elèv yo manke sipò an pèsan nan men kamarad ak pwofesè yo, pwofesè yo dwe diminye kantite travay yo abityèlman asiyen bay elèv yo an relasyon ak kantite total devwa yo te ka genyen otreman nan yon anviwònman kondisyon lekòl nòmal.
- **Kòman yo pral kontwòle prezans chak jou pandan 4èm peryòd nòt la?** Apati 6 avril 2020, elèv yo ap antre nan pòtal elèv la pou yo ka anrejistre yo prezan nan lekòl la. Elèv yo ap resevwa yon alèt konfimasyon lè yo siyen non yo. Si yon elèv pa siyen non li nan pòtal la, limenm oubyen paran li yo ap resevwa yon apèl telefon otomatik nan demen vè midi, ki endike elèv la pa t siyen non li nan pòtal la jou anvan an e yo te make li absan. Elèv ki nan klas Pre-K jiska 2èm ane eskolè ak elèv ki gen andikap, ki ka pa kapab konekte poukont yo, paran/gadyen yo ka ba yo asistans. Nou ankouraje elèv yo pou yo siyen non yo pandan lè lekòl regilye yo.
- **Kòman yon elèv oubyen yon paran ka konteste yon absans?** Nenpòt elèv/paran ki mande pou konteste yon absans ap gen yon peryòd 72 èdtan pou soumèt yon demand apèl/koreksyon (atravè lèt elektwonik) bay administrasyon lekòl la. Demand la dwe gen ladan evidans sipò ki demontre elèv la te angaje/patisipe nan yon aktivite aprantisaj a distans apwouve pou jounen ki an kesyon an. Evidans sipò yo ka gen ladan bagay tankou: lèt elektwonik avèk pwofesè yo, ilizasyon platfòm nan avèk mesaj ki date,



KESYON MOUN POZE SOUVAN SOU APRANTISAJ A DISTANS



pwogram enstriksyon sou Entènèt, oubyen nenpòt platfòm edikasyonèl sou entènèt ki kontwole dat/lè. Direktè a ka detèmine lòt evidans/rezon ki jistifyab.

- **Èske elèv ap resevwa nòt pou aprantisaj a distans?** Kòmanse lendi 6 avril, elèv yo ap resevwa yon nòt minimòm pa semèn pou chak sijè. Pwofesè yo ap pèmèt elèv yo ratrape nenpòt devwa yo ta manke pandan tout peryòd nòt la e apre re-ouvèti kanpous yo pou ane lekòl 2019-20 an. Pwofesè yo ap kontakte paran y o ak konseye gidans nan lekòl la si elèv la pa angaje li nan leson ak devwa yo asiyen li yo.
- **Kòman m ka kontakte lekòl pitit mwen an?** Sou paj prensipal dadeschools.net klike, nan mo 'Schools' ki anlè a, apre sa klike sou 'School Information'. Yon fwa ou sou paj lis non an, chèche lekòl pitit ou a e klike sou non lekòl la pou jwenn aksè sou paj prensipal lekòl la. Finalman, klike sou bouton adrès elektwonik ki sou kote foto lekòl la anlè paj la pou jwenn aksè sou adrès elektwonik direktè a.
- **Kòman mwen ka kominike avèk pwofesè pitit mwen?** Meyè fason pou w kominike avèk pwofesè pitit ou se atravè mesaj elektwonik oubyen platfòm sou entènèt nou te endike nan Lis Elèv pou Fèmte Lekòl la pandan lè biwo pwofesè yo. Nou atann pwofesè yo ap disponib pou elèv pou pa plis pase twazèdtan pou jou. Si w bezwen asistans pou kominike avèk pwofesè pitit ou, silvouplè kontakte lekòl pitit ou a.
- **Èske tout pwofesè ap itilize menm platfòm oubyen pwogram sou Entènèt?** Nou ankouraje pwofesè pou yo itilize platfòm yo menm oubyen elèv yo te konn itilize avan fèmte lekòl yo. Si pwofesè yo pa t gen yon platfòm avan, nou ankouraje yo e nou ba yo fòmasyon pou itilize 'Microsoft Teams.'
- **Kòman paran ka aprann plis sou aprantisaj sou Entènèt ak lòt sijè ki gen rapò ak li?** Akademi Paran Distri a ap lanse de (2) nouvo atelye akademi sou Entènèt ki gen pou tit "*The Instructional Continuity Plan for Parents and Helping Children Cope During Forced Isolation*" (*Plan Kontinuite Enstriksyonèl pou Paran Ede Timoun Jere Izolasyon Fòse*). Silvouplè vizite Koupous sou Entènèt Akademi Paran an nan <https://parentacademymiami.com/> pou atelye sa yo ak lòt atelye enpòtan ki adrese sijè tankou: sekirite sou Entènèt, sigarèt elektwonik, "Open Educational Resources (OER)" (Resous Edikasyonèl Ouvè), anksyete, ak sante mantal. Ou ka suiv tou Akademi Paran an sou Twitter nan [@FamilySS_mdcps](https://twitter.com/FamilySS_mdcps).
- **Kisa distri a ap fè pou ogmante sekirite sou Entènèt pou pwoteje elèv ak fanmi yo? Kisa mwen ka fè kòm yon paran pou pwoteje pitit mwen?** Sistèm Entènèt distri yo pwoteje paske se pou w antre nan yon pòtal pou w ka jwenn aksè avèk yon idantifikasyon ak modpas ki pwoteje e ki filtre rezo a pou bloke kontni ki pa apwopriye. Akoz kèk pwofesè chwazi pou yo itilize 'zoom' kòm yon mwayen pou anseye ak videyo e kominike avèk elèv, nou achte vèsyon antrepriz pwogram nan yo ka kounye a itilize an konjonksyon avèk 'Microsoft Teams'. Toude aplikasyon sa yo disponib sou pòtal elèv ak pwofesè yo, ki se anviwònman sekirize san entèripsyon. Nou ankouraje paran pou yo



KESYON MOUN POZE SOUVAN SOU APRANTISAJ A DISTANS



asire elèv yo retire nenpòt ansyen vèsyon 'zoom' yo te enstale anvan nan aparèy yo e enstale 'Microsoft Teams'. Nou dwe sonje sit Entènèt ki depase domèn nou mande sipèvizyon paran e akòz elèv ki sou Entènèt plis tan toujou, li enpòtan pou paran yo vijilan pou yo asire sekirite sou Entènèt.

- **Ki akomodasyon ki ap fèt pou elèv ki pa pale Anglè?** Elèv ki ap Aprann Anglè yo ap resevwa menm sèvis ak elèv ki metrize Anglè yo, men yo ka itilize diferan platfòm ki gen tradiksyon otomatik. Pwofesè yo ap kontinye itilize estrateji ESOL yo pou sipòte Elèv ki ap Aprann Anglè yo.
- **Ki modifikasyon ki ap fèt pou elèv ki gen bezwen espesyal yo?** Distri a adapte kontni yo pou yo aksesib pou elèv ki gen bezwen espesyal yo. Pa egzanp, elèv ki gen Andikap Vizyèl yo resevwa enfòmasyon sou fason pou yo gen aksè sou aplikasyon pou tèks diskou, pou gen aksè sou bibliyotèk liv odyo, ak sèvis bray pou leson siplemantè pou elèv ki bezwen bray. Entèprèt Lang Siy yo ap travay avèk pwofesè ki itilize 'Microsoft Teams' yo. Bay konsèy ak lòt sèvis ki gen rapò ak IEP ap fèt sou Entènèt nan yon degre ki pratik. Yo ajoute plis resous enstriksyonèl nan Plan Kontinite Enstriksyonèl la pou ofri sipò bay pwofesè elèv ki gen andikap yo. Pwofesè elèv ki gen gwo andikap e ki pa kapab navige sou platfòm aprantisaj sou Entènèt yo ap prepare leson altènatif avèk konsèy y ap jwenn nan men anplwaye Depatman ESE a.
- **E si pitit mwen a nan pwosesis pou evalyasyon pou detèmine si li elijib pou sèvis espesyalize (Elèv ki Gen Don oubyen ESE)?** Seleksyon, evalyasyon, evalyasyon sikolojik ak edikasyonèl, "Individual Educational Plans (IEP)" (Plan Edikasyon Endividyèl), ak Plan Seksyon 504 ki pako acheve yo ap fin konplete atravè telefòn oubyen sou Entènèt nan yon degre ki pratik. Si gen yon gwo reta, se anplwaye distri ki apwopriye a ki ap fè paran yo konnen rezon ak dire reta a ansanm ak plan pou avanse pi vit posib pou evite yon reta konsa nan lavni.
- **Kisa ki pral pase pou aplikasyon magnet pou ane lekòl 2020-2021 an?** Notifikasyon yo ap kòmanse lendi 30 mas. Paran/gadyen gen jiska 15 avril pou yo aksepte òf admisyon yo. Si paran/gadyen legal yo te aplike sou Entènèt oubyen sou papye, e yo te bay yon adrès imèl ki valid, yo ap resevwa yon notifikasyon atravè imèl e yo ap ka aksepte plas yo a 15 avril oubyen avan sa. Si paran/gadyen legal yo te aplike sou papye e yo pa t bay yon adrès imèl ki valid, yo ap resevwa notifikasyon an pa lapòs e yo ap ka aksepte plas yo a lè yo rele liy enfòmasyon an nan 305-995-HELP 15 avril oubyen avan sa. Si paran/gadyen legal yo gen kesyon konsènan akseptasyon nan pwogram Magnet la, yo ka rele liy enfòmasyon M-DCPS la nan 305-995-HELP.
- **Kisa ki pral pase pou egzamen FSA yo?** Eta a te anile tout evalyasyon yo pou ane sa a.
- **Kisa ki pral pase pou egzamen SAT yo?** Komisyon Kolèj la anile administrasyon Egzamen SAT 2 me 2020 yo ansanm ak Egzamen pou Matyè SAT yo. Elèv ki te deja enskri pou me, kote sant egzamen mwa mas yo te fèmen, oubyen ki pa t resevwa nòt



KESYON MOUN POZE SOUVAN SOU APRANTISAJ A DISTANS



pou mwa mas akoz iregilarite yo ap resevwa ranbousman. Nan jou ki ap vini yo, Komisyon Kolèj la pral ofri plis enfòmasyon ak detay dirèkteman ak elèv ki enskri yo ansanm ak sant egzamen yo. Komisyon Kolèj la pral ofri plis opòtinite egzamen SAT nan lavni pou elèv yo osito sa posib nan andwa kote yo te anile administrasyon egzamen yo. Yo pako anile administrasyon egzamen SAT 6 jen 2020 an ansanm ak Egzamen pou Matyè SAT yo e yo pral kontinye evalye sityasyon an. Yo ap eksplòre tou posibilite pou ajoute yon administrasyon entènasyonal pou SAT nan fen ane lekòl sa a. Silvouplè klike [la a](#) pou plis enfòmasyon.

- **Kisa ki pral pase pou kou ak egzamen AP yo?** Komisyon Kolèj la ofri sipò enstriksyonèl atravè yon [YouTube channel](#) ki ofri revizyon andirèk pou Kou AP yo. Nou ka jwenn chèn nan [la a](#). Komisyon Kolèj la anonse tou yon nouvo opsyon egzamen pou elèv “Advanced Placement (AP)” (Plasman Avanse) yo pran lakay. Pap gen administrasyon egzamen tradisyonèl fasafas la. Elèv yo ap pran yon egzamen 45 minit sou Entènèt lakay yo sou fòm esè. Pou chak matyè AP, ap gen 2 dat diferan pou egzamen yo. Orè konplè egzamen an, modèl kesyon ak repons ki pral sou chak Egzamen AP yo, ansanm ak lòt detay ap disponib 3 avril oubyen avan sa. Nou vle ankouraje tout elèv AP ki enskri yo pou yo pran egzamen AP 2020 an lakay yo. Pou plis enfòmasyon, silvouplè klike [la a](#).
- **Kisa ki pral pase pou Egzamen Cambridge yo?** ‘Cambridge International’ deside pou l pa fè seri egzamen me/jen 2020 yo a. Sa gen ladan Cambridge IGCSE, Cambridge O Level, Cambridge International AS & A Level, Diplòm Cambridge AICE ak Cambridge Pre-U. nou rekonèt elèv yo t ap travay di pou prepare pou egzamen sa yo. Nou ap travay avèk lekòl yo pou evalye akonplisman elèv yo nan itilize meyè evidans ki disponib yo. Elèv yo ap resevwa yon nòt ak yon sètifika ki soti Cambridge International, lè nou konsidere konesans ak ladrès yo resevwa nan pwogram etid yo. Sa ap asire elèv yo pa sibi yon dezavantaj akòz sikonstans ekstrawòdinè sa yo. Pou plis enfòmasyon, silvouplè klike [la a](#).
- **Kisa ki pral pase pou Egzamen Bakaloreya Entènasyonal yo?** Egzamen me 2020 ki te pwograme ant 30 avril ak 22 me pou kandida “Diploma Programme (DP)” (Pwogram Diplom ak “Career-related Programme (CP)” (Pwogram ki gen rapò ak Karyè) yo pap fèt ankò. Selon sa elèv yo te enskri pou li, yo ap resevwa yon Diplòm oubyen yon Sètifika pou Kou ki reflekte estanda travay yo. Sa ap fèt sou baz travay elèv la te fè pou kou a ansanm ak ekspètiz evalyasyon ki etabli a, rijidite ak kontwòl kalite ki deja bati anndan pwogram yo. Pou plis enfòmasyon, silvouplè klike [la a](#).
- **Kisa ki pral pase pou kou “Dual Enrollment (DE)” (Anwolman Doub) yo?** Nou ankouraje tout elèv DE yo pou yo kominike dirèkteman avèk pwofesè kolèj yo oubyen yon pwofesè M-DCPS ki gen kalifikasyon pou DE. Pwofesè ki gen kalifikasyon pou DE yo gen leson ak resous ki disponib sou sit Entènèt edikasyonèl yo ansanm ak lòt platfòm elektwonik. Gen yon feyè ki gen plis enfòmasyon ki disponib nan <http://distancelearning.dadeschools.net/> anba ‘Student Resources’.



KESYON MOUN POZE SOUVAN SOU APRANTISAJ A DISTANS



- **Kisa ki pral pase pou kou estaj ak kou pou apranti yo?** Tout kou estaj yo anile. Elèv yo ap gen aksè sou 'Odysseyware' ak 'my CareerShines' pou konplete modil eksplorasyon karyè yo ak kou aprantisaj ki baze sou travay. Silvouplè vizite <http://dcte.dadeschools.net> pou plis detay.
- **Mwen se yon elèv dènnye ane segondè, èske map elijib pou m gradye ane sa a?** Elèv dènnye ane segondè ki satisfè demand kredi kou yo E ki gen yon GPA (mwayèn jeneral) 2.0 sou yon echèl nòt 4.0 ap kapab gradye menmsi yo poko pase Evalyasyon Lekti/Redaksyon 10èm ane eskolè a oubyen Aljèb EOC a akòz eta a anile tout egzamen pou ane sa a. Elèv ki nan Klas 2020 (dènnye ane lekòl segondè) ap resevwa yon imèl avèk enfòmasyon adisyonèl ak yon dokiman Kesyon yo Poze Souvan pou Elèv dènnye ane segondè. Asire ou tcheke imèl ou nan dadeschools.net.
- **E si mwen pa t fin konplete yon pwojè sèvis kominotè e mwen se yon elèv dènnye ane lekòl segondè ki pral gradye?** Lè nou konsidere bezwen moun genyen kounye a pou izole yo sosyalman e rete lakay, nenpòt elèv dènnye ane lekòl segondè ki pral gradye pou ane 2019-2020 an e ki toujou gen yon Pwojè Sèvis Kominotè pou l konplete pou l ka satisfè kondisyon pou gradyasyon ki nan Règ Komisyon Konsèy Lekòl 5410 a, e ki gen referans nan Plan Pwogresyon Elèv la, dwe konsidere fè rechèch sou yon kesyon ki gen enterè ak enpòtans nan nivo lokal, eta, nasyonal, oubyen global e voye yon lèt bay reprezantan nan nivo lokal, eta, oubyen nasyonal pou eksplike poukisa yo santi li enpòtan pou gouvènman yo aji sou sitiyasyon yo fè rechèch sou li a. Nou ankouraje anplwaye nan lekòl yo ki gen responsablite pou apwouve Pwojè Sèvis Kominotè elèv yo pou yo montre yo osi fleksib posib pandan y ap satisfè misyon Sèvis Kominotè a ki se yon kondisyon pou gradyasyon.
- **Èske elèv yo ap ka mande relve nòt pou aplikasyon kolèj oubyen bousdetid?** Elèv ap ka jwenn relve nòt ki pa ofisyèl atravè Pòtal Elèv la. Yo ap ka kòmande relve nòt ofisyèl yo atravè sit Entènèt lekòl la, faks, oubyen lè yo kontakte lekòl la dirèkteman. Opsyon pou fè kòmand yo ka diferan selon lekòl la.